



KERJAYA CEMERLANG

■ Program Pembangunan Profesional Ekuinas lahir tenaga kerja berdaya saing

Nabil Basaruddin
nabil.basaruddin@
hmetro.com.my

Petaling Jaya

Ekuit Nasional Berhad (Ekuinas) menerusi ILTIZAM Program Pembangunan Profesional (PDP) kini berjaya melahirkan kumpulan pekerja profesional dan pakar dalam pelbagai industri seiring dengan keperluan pasaran pekerjaan ketika ini.

Program pengurusan berstruktur yang dilaksanakan dalam tempoh 12 bulan itu bukan sahaja membantu golongan graduan untuk mendapat tempat dalam alam pekerjaan, malah ia



"Latihan yang dijalankan itu adalah begitu komprehensif kerana selain ditempatkan di industri bagi memantapkan kemahiran masing-masing"

HIZWANI HASAN

turut mengubah kehidupan mereka sehingga berjaya memegang jawatan tinggi pada hari ini.

Pengarah Hal Ehwal Pihak Berkepentingan Ekuinas, Hizwani Hassan berkata, sejak dilaksanakan pada 2012, program berkenaan sentiasa mendapat perhatian golongan muda dan pada tahun ini pihaknya mendapat kira-kira 7,000 permohonan berbanding 3,000 pada 2016.

Beliau berkata, program latihan yang dijalankan itu adalah begitu komprehensif kerana selain ditempatkan di industri bagi memantapkan kemahiran masing-masing, pelatih PDP turut perlu hadir ke latihan dalam kelas yang diadakan

secara berkumpulan. Pada masa yang sama mereka menerima bimbingan secara persendirian dari pengarah dan pengurusan di Ekuinas. Prestasi setiap pelatih dipantau sebanyak mana yang diperlukan untuk memastikan setiap pelatih mencapai potensi masing-masing.

"Program ini memberikan pengalaman di tempat kerja supaya mereka lebih cekap di samping memberi ruang kepada Ekuinas untuk mengenal pasti kekuatan setiap pelatih supaya kami benar-benar melahirkan profesional yang berdaya saing dan cekap."

"Antara kelebihan mereka peroleh dengan menyertai program ini,

pelatih akan ditempatkan di bawah syarikat-syarikat yang dikendalikan oleh Ekuinas sendiri dan syarikat rakan kongsi. Mereka juga diberikan tugas projek khas dan pemantauan berkala," katanya.

Pelatih PDP turut diberikan manfaat seperti gaji setiap bulan sebanyak RM2,500, insurans perubatan dan cuti tahunan menjadikannya sebagai pakej yang menarik sekali guna mewujudkan suasana latihan yang meyakinkan.

Malah, rata-rata pelatih program profesional ini sekitar 80 peratus mendapat pekerjaan tetap setelah tamat program latihan itu dan pihaknya akan memantau sehingga mereka ditawarkan kerja yang tetap.

Sementara itu, pelatih PDP yang kini bersama firma audit terkemuka sebagai perunding khidmat antarabangsa Ernst & Young, Mat Fazli Mat Johari, 27, berkata, peluang menyertai program berkenaan adalah penanda aras dalam kehidupannya untuk lebih berjaya dan maju kehadapan lagi.

"Apabila menyertai program ini, saya ditempatkan di Kolej Cosmopolitan dan diberi

tugas menguruskan pelajar antarabangsa. Dari situ segala latihan yang diberikan dapat diperaktikan terutamanya dalam pengurusan tekanan tempat kerja," katanya.

Mat Fazli yang memegang Sarjana Muda Pengurusan Hotel dari Universiti Antarabangsa UNITAR itu juga berkata, program itu mengajar dirinya untuk mengubah pemikiran supaya sentiasa optimis dan bangkit dari kegagalan.

Bagi Norhilawati Hamzah, 31, setelah menamatkan pengajian dalam bidang Ijazah Sarjana Bioteknologi di Universiti Teknologi Malaysia (UTM) dan Ijazah Sarjana Muda Bioindustri di Universiti Putra Malaysia (UPM), beliau tidak mendapat mananya tawaran sehingga menyertai program PDP di bawah Ekuinas itu.

Menurutnya, apa yang beliau inginkan hanyalah pengalaman bekerja kerana ia dapat mematangkan dirinya untuk lebih berjaya pada masa akan datang dan PDP adalah antara peluang keemasan yang begitu bermakna buat dirinya.

"Sebagai individu, sudah tentu saya inginkan pengetahuan dan pengalaman baru dalam bidang pekerjaan. Menjadi pelatih PDP membolehkan saya menimba ilmu baru apabila ditempatkan di KinderKaizen", katanya.

Tambahnya, sebagai pelatih PDP, meskipun sudah menamatkan program berkenaan, apa yang penting bagi dirinya adalah untuk memberi kembali apa yang diperoleh sepanjang setahun dengan membantu graduan baru.

"Setiap perkara adalah benda baru yang boleh dijadikan proses pembelajaran. Saya tidak mahu mereka terus kecewa kerana terdapat banyak saluran boleh digunakan untuk mara sebagai individu yang berjaya," katanya.

Permohonan bagi kemasukan baru akan dibuka pada Februari 2018 dan mereka yang berminat boleh memohon melalui laman web Ekuinas di bawah bahagian Tanggungjawab Sosial Korporat (CSR). Borang permohonan bagi program PDP boleh didapati di laman web berkenaan.